



## Editorial

Pathian mapuina jal in “Damna Aw” July 2020 suakdawk thei ding ah zia chan tiang ei pui-tungtu Pathian chu lopina chang ta hen. Hun haksa leh hun buai um kikawngkal ah Pathian in Khuga Sadar Presbytery ei mapuinate ka ngaitua in ka lungthim ah La hung kilang chu “I Pathian in ei pui zing sek, zia chu hia’n ka kipak ma mai,” ti hi ahi. KSP khangthu sut in a chang chang leh I lungngai sek a, a chang chang leh kipakna tamtak a um sek hi. Sapten life up and down a tiu a, zia chu mimal hinkhua leh pawlpi ah le lam suk lam to I zawt chang uh tamtak a um sek a, tui hat I pal chang uh leh tui nem I pal chang uh tamtak a um sek hi. Himaleh zia hun zosia a chun Lalpan ei nusia diak pua, a suangphum chu dettak in a ding zing a, Lalpa chu pak in um ta hen. Tu lockdown sung a hin KSP khangthu ka sut a, I nu leh pa masateu in Lalgam nasepna ding ah haksatna tamtak a la thuak in sem mualsua man lo in tamtakten

kumtuang gam ei la zawt san tau a, I hotu masate, pastorte, upa masate leh hotu dang dang te lungthim mitha’n a kilang zung zung mai hi. Amau hapanna zal leh kipiakdawna zia in tuni hin a suan leh pakteu in a nasepnauga lo in, mawl tak leh gentheina tamtak thuak pum ah bul ei la pat piak uh chu limbang I bel uh ahi. La phuaktu chun, “Tu hin a pak gimtui ka tep pan tai, aw a nawp tuak na e! a ti gual in tu hin a pak gimtui teplawk pan I hiu a, dan leh ni tak leh a bukim in Lalpa kengbul ah kipak in kikhawm hi tiu in, van mithiangte haw zosia khi tawh; zia phat chu leh siatleigam ah Lalpa zia ah I lungzinnau hi I Lalpa ma ah I kipak La ding uh ahi. Tu ah ei uh pastorte, upate, semtute leh hotuten lalgam na I sepnau ga hi tunung ah khangthakten hung luak kit ding a hiu a, bang gual ga a hun luak diam uh? ga pha a luak diam uh, ga pha lo? Tu chung lockdown ah hin kochuam pawlpi khenkhat chu office

kai thei lo, khenkhat kit chu office kai ngal sum lut chuam diak lo, no work, no pay gen kha bang a um lai ah ei uh vangphat dan chu biak in kikhawm thei lo leu hing le bialtu pastorten pan a hun lau a, kochuam tin a pat Pathian lal-gam thawlawm a lut ding gual in a hung lut tho a, chun office le hun chawmcha sung ti lo chu phatak in a kikai to thei zing a, budget kitung khel lo leh le I sep ding teu I sem thei a, I semtuten le kitup tak in law (pay) a la zing thei ua, kipak a um ma mai. Tuhin malam hun tawm zaw I nei tau a, chun tukum a ding ah sep ding kiguanggalte sem zo taw-bang le I hitau a, zia lak ah lopi pen chu ginna kalsuan in Pathian muang leh a hausakna kikawppi ah KSP. munki ding 1 crore 15 lakhs ding ah Pu S.K Haumang gam, Torbung Bangla I la kihopiu kha a man piak zaw ahi ta, Lal-pa lopina chang ta hen. Maban ding chu Trustee Comtt. ten hung ngaitua to zel ding ahiu. Buaipi kipat til lai chun kei chu crore val a hung kigen phat in lawite kiang in, “Ka ginna’n a ban pha ta pua, nangmau ginna kikawppi ah la

lung uh kiaklona ding ah la nung uh zuitu ka hi,” ti’n ka la gen hi. Tu hin a tak a hung chang ta, ka sepkhawmpite lungletna chung in kipak thu ka puang ahi. Aw le, in ka ngaituana hung kilangdawk chu William Carey in, “Expect a great thing from God and attempt a great thing for God,” a ti chu ahi, Amen.

--o0o--

# Pathian Pawlna Hinkhua -Mat.6:5-13

-Rev. Seilunlal Vaiphei

**B**ishop pakhat chun, “khawvel gam chuam chuam kataw tam in thil kilawm tak tak le ka mu tam ta khawp mai hi. Zia ka thil mu zosia lak ah kilawm chungchuang pen ka mu chu –‘Gitlo sim ah khupdin’ hi ahi” a tii. Gitlona neilo kua ma i um puau a, i gitlonte u haisan a Pathian i pawl hin Pathian nasemtute’n kilawm a la sa sek uh ahi. Tuni hin zia gual Pathian pawlna hinkhua chu ala ngaitua khawm ding ihu.

**1. Pathian pawlna umzia :** pawlna hi gingtu hinkhua hihattu Khristian ten Pathian pawlna i tinau a, ‘pawl’ paukam hi Grik pau a chun, ‘Koinonia’ a tiu a, zia chu Sappau a chun “fellowship” a ti na ahi. Tulai kochuam ah khanglaite’n ‘fellowship’ ti paukam hi i mang mun takhawp mai ua, ‘kipawlkhawmna’ tina in i mang ui. Ahin, tuni i gen ding uh Pathian pawlna hi tawh, tulai khanglai ten i mat sek uh “Fellowship” ti hi chu a kibang kit get puai. Bible ah kipawlna a ti hi chu Pathian leh mihing kikal ah kichamna zia ah kipumkhatna leh kikawp lemna, kichanau na dawu umtak hung um hi ahi. Gen 5:21-24 ah khan Enok chu Pathian tawh a kivawp sek ui ti mu ahi. Tichun, kipawlna ti chu kikawmtua zing, umkhawm deu zing ti genna a hi.

**2. Pathian pawl a lulna:** Pathian

khat ahi. Pathian in a pawl ngai-lo gingtu chu a kipuk pai sek hi. Mi’n Pathian a pawl chun Pathian lopinate, Pathian puihuainate leh malzawlnate a thak in adawng sek ui. Pathian pawlna a kipat hin sual ah pukta mihing chu Pathian batna nei in siam thak in a umkit sek hi. Zia guala siamthak ah umta gingtu chun Pathian mizia – hepinate, diknate, felnate, thianthonate a chun Pathian a pawl zinglo ahileh a kipuk kit sek in, a dakit mai sek hi. Maleh, Pathian pawl zingsek gingtu ahileh chu thepna a zo a, zotu hina malzawlna leh Pathian pawlna thak kipak um tak chu a chang zui zing sek hi. Ziate zia ah hin gingtu a dingin Pathian pawl zing hi a lul ma ma ziang a, Khrista ah hinna kingakna bulpipen in a mang sek

a hi.

**3. Kuate'n a hem Pathian a pawlsek?:** Mi zosia'n Pathian a pawl thei ti chu a dikna tiang chu aum a. Himaleh Pathian pawl thei zosia hin a pawlsek puau hi. Pathian ngaisaklo leh mi lulul, Pathian dawidan sang ah mani dawidan ngai paw-imaw zawsekte, kipilsak a, Pathian mamawlo hial ah kingai leh chapote'n Pathian a pawl ngai puau. Pathian pawl sektute chun Pathian a dawng zing ziangua, Pathian panglo a chun thepna a do zo pua ti kihechian khawpa ama kipilsak kawm hilote, mi kingaitawm leh Pathian ngainatna chang hete'n Pathian a pawlsek ui. Zia guala Pathian pawl sekte kiang ah um mite chun nuam a sa sek ui. A mau ah Pathian mizia hepinate leh thianthona leh a dang dangte kha amusek ziakun mite'n a ngaina sek ui.

**4. Pathian pawl ngailo hinkhua:** Gingtu min pu ngal ah Pathian pawl na chang helo mi chu a chapo a, a hinkhua Pathian hepina a kilang puai. Pathian mizia mihingin a chansek diknate, ginum-nate, thianthonate, felnate kha

a hinna'n mite'n a mulo ziakun a ngaina tak tak thei puau. Zia bep chu ahipua, Pathian pawl ngailo chu thepna chichuam chuam, sum leh pai mangah thepnate, zu leh khamthei thil dang dang mang ah thepnate, numei-pawsal hina suauna gitlona lam ah thepnate, thunei leh lalna mang ah thepnate, a do zo tak tak thei puau, a ginnau a chau a, a thagau hinkhuau a chuai in, a kipuk mai sek ui. I gamua piangthak pukit te hi Pathian pawl peilote a hi deu ui. Haksatna leh gentheina, nasep leh zillai a lawsapna leh natna a thawk unle, Pathian pawlsekte hinna thamuanna thuguk umsek gual hi a neilo ziakun a bei uh a dawng ma ma a, a mau kihatnuam hial ziang le a um sek ui. Ziate kipat a hin gingtu a dingin Pathian pawl zing chu a kul takzet hi ti i hethei ui.

**5. Pathian pawl dan lampite:** Pathian pawl dan lampi chuam chuam a um hi. Ziate lak ah chun gingtute'n a mat nuam deu teu tamtak lakin tuhun ah kochuam ten i mat thei teu chawm chan vak enkhawm hitiu:-

**i) Pauchapna:** Lal Jesu'n a nung-



*Sutzawpna..*

## **Pathian kiangah thilpiak**

*By Upa L.T.Khupa, Tuibuang*

**B**ible chun kipakna chu lak sang ah i piak hin a um nasa ma ma'i. Mi gentheite panpina ding ah la sepgim ding dan uh leh ama l Lalpa'u Jesu ngei in "Lak sangin piak in lukhawng anei zaw'i ati kha hezing un atia" (Nas.20:35). Sam 68:19 i sim chun Lalpa nisin ah i kul leh mamaw zosia ei pia, ei dawmsangpa chu pakin um ta hen. Zingkal i hung thawthaw in Lalpa chu i pak diu ahi, i hinnau nikhat ei belap piak kit ziakin. Lal David in hitin a zik a "Ni suana kipat a tumna tiangin Lalpa min chu pakin um ta hen. Thagau leh taksa malsawmna tamtak ei dawnsak ziakin, zia tak ah hin ka chung ah a thilbawl phat zosia ziakin Lalpa kiang ah bang ahem ka piak thuk ding.?" (Sam 116:12) ti hi ngaitua ah i chung ah a thilbawl phat te gelzel ah ei unle Lalpa chung ah bang i bawl in a gam a dingin bang i pe thei awm ti ngaitua kul mama ahi. Mi zosia'n phallo sa sa'n pawng

changsan ah piak ding ah ngai ah pia hilo in, lunggil ah atup gual un pechiat uhen, kipak tak ah pete chu Pathian in a kipakpi ngala(2Kor.9:7).

I biak Pathian uhi thil phaltak ahia, a chapa neisun le itchalo ah ei a ding ah petu ahia, ziakachun ama hote(bete) chu a thilphal(huangphal) di'u ahia, sawma pakhat beple ama a dinga itchatu chu thilpiak ah a pianthak a ngai ahi. "Thilphal(huangphal) te kithawina chungin Pathian a lunglam tak ahi ngala(Hen.13:16).

Chuleh, Levite zosia chu kikhawpna biak buk ah nasep thilbawl bangkim ah a panna zia kun Israelte lak ah kipat a sawmakhat zosia'u ka pia ahi(Num.18:21). Zia tak ahin a gochan ding ua a piak, Israelte a sawmakhat lak ua kipat a sawmakhat ma Lalpa a dingah la latdaw kit ding uh ahi atia(Num.18:26). Zia thu ahin Lalpa'n sawmakhat a

ngaihawk dan le kichian takin i mu thei uh ahi. I sawmakhat leh thilpiak dingte pe phawt mai leu hin Lalpa'n ama sep ding hun sem piting mai ding ahi. La pakhat in a gen gual in "Peta un tichun piakin um inla'u, thilpiak in Pathian khumzo(lanzo) puanla, Pathian in mihing lei aba ngai puai, malzawl na nak ahi ngala" ala tia a dik mama ziang ahi. Sawmakhat piaklo a pawik(khawk) dan

Ei malzawl nuam Pathian tawh i kizawpna i suksiat uh ahi. Ei patep(test) mai tiam un(Mal.3:10) titu Pathian thugen hi i ngaisak nuam puau tina ahi. Ei uh lo ah tasam lopa hin ama lo ah tasam i hi dan ei hiatsak nuam a, i ngaisaklo uh ahi. Pathian mamaw(kul) lo in bang chan tak umthei ding ihu em?

Ei pian la mal hun zawl zel ingka ti in, ei pe zel inla hun malzawl zel ingka ti chun la damsung leh hinkhua ah kei mun(panmun) ei pian tina ahia, himaleh ama i ngai taktak puai tina ahi. Pathian chan ding pelo ah sum tamtak tak mang ah a malzawl na i dawn te mangcha

sum kawl i vei ngam uh bang hi chu i hangsan mamau ahi. Hiat phaklo ziak ah hangsan vang i hi ngei ui.

Ei un i kitinlo uh suanlam in i nei sek ua, eile ei kitinglo ding ah kibawl ila hizing hi ti ala helo i hi zing ui.

Government(sorkar) nasem pakhat a lawi ginglo te tawh law la ahung sek ua, Kochuam Office ah sawmakhat peding in ahung bang seka, a lawite'n mak asa khawng ua, thasin ah sawmakhat la piak te hi la ki dai(kiting) na ahem? tia a dawt ua leh "Sawmakhat ka piak ma in ka kidai(ting) ngai puai, kapiak ah kipat in ka kiting(dai) zawi ati leh a lawi ten mak asa ma ma'u hi. Adik ngala, ginglote hiatthiam zaw di gual vang ei puai.

Pathian ngaisak mama bang ngala sawmakhat pe ngailo i hina hin Pathian chan ding guk piak zing ihu ti he taktaklo i bang ui. I lak ua maktak chu eima piak ding pelo kawmkawm ah i kochuamte piaksa su chavai i um sek naklai uhi ahi. Thunei a pang phalo ten le i enla pha nalai sek

ui. Pathian nasepna ah panmun pawimaw taktak lua pum ah Pathian lau lo hial ah tawi hi thil tizat um leh hanse law channa ahi dan he chianlo mama i bang ui.

Mi tamtak in a hiatchian dan un sawmakhat pelote chun, a piaklo gun uh khawitak ahem in a sunglut thotho ui atiu ahi.

Kipak tak ah la piak leh van ah go la khawl khawm a, la piaklo leh la piak di gun la sun lutna ding, la vangsiat leh la sumpi na tiang but gam na ding tuakkha thei la hi. Kipak tak ah pete chu Lalpa'n a hepi hi. Lungngai taka piakdaw sangin kipak takah piak lut apha zawi. America gam in mi hausa khat ahung piangthak a, sawmakhat phatak in ahun pe pan ngal a. Sawtlo nungin a dawr thupitak chuh mei in a kang tum ziang ta. A kochuam mite chun a dapi mamau a, ginna ah a kinung tawl kha diam aw, ti kawm in a siatbat ding in a chiau a, a vak henem ua leh, ama chun a ginchak guallo tak un ahun dawnhu a, unaute haw ei lungkhampi ki'u in, kei chu thagau lam ah ka kipak mama

hi. Vangsiatna hi kua chung ale tung thei ahi ziakin kei chung ale a tung ahi. Jesu ka nei ma a tunglo ah, ama jesu kamu nung ah zia gual ka tuak hi ka kipak ahi. Sawmakhat te kala pe zel a van a go kala khawl khawm man ta, zia te khah zia meikuang hin a kang pha talo ahi. Amun ah a kichian i sa'u em? van ah go i khawl khawm teu hi guchate'n a guk phaklo uh, tui ek inle a neksiat phak taklo uh kumtuang ah um zing ding chu ahi.

Rev. Dr. Kh. Khaizakham article apat in sawmakhat pelote chu Pathian chanvo gulo ding ah kochuam mite hil chu ka mawpuakna in ka ngai hi. Tualtha lo ding, angkawm lo ding, gukchak lo ding ti haw hile i kihil uh hilo ahem? Pathian chanvo gulo ding ah kihil khel a pawimaw bang dang a um ah ahem? Thuthunglui a ding bep ahi, thuthungthak ah sawmakhat piak ding a ki gen puai ti hi chu Pathian piak ding ah sumsialte Bible suidan ahi bep hi. Thuthunglui a zia gual ah a gen pawimaw hi, a sukbeina a umlo nak leh piak zawm ding ahi mai



hi.

Kochuam mipite chuh ka hepi ahileh, malzawlina leh lamzanna bulpi, sawmakhat piak ahi ti ka hillo chun, thil pawimaw mama ka hillo tina ahi. Ziakiakahin, kochuamte chu hil ngei ngei ding ahi. Kochuam ah i hotute gen bep ngansia lo in, In tin pate hin eima piak bep hilo in i chate le pe ngei dinga thuzaw a ngai nalai hi.

Tulai khristian tamtak a dingin sawmakhat phatak ah piak hi thil haksa tak ahi. Ahinla mi tamtak in thu chuamchuam a kimu dungzui in sawmakhat bep hilo in sawmakhat sanga tamzaw, sawmani, sawmathum pe lawi le a um tho uh ahi. Mi tamtak in a sum mu'u hi ahung tam deudeu leh sawmakhat piak hi, haksa asa deu deu sek un tax pete lawi in, bang kibawl leh income tax piak tawm thei ding dan a gel gual un sawmakhat piak tawm ding buaipi mi tamtak a um ui. Officer khat in a sawmakhat ting zolo deu hi ding ahia mi khat in hitin ava gen a, "Hepu, la Peon pa'n sawmakhat phatak in a pia nangin bang ziak ah tinglo deu

a la piak ahem?" ati leh ama a law tawm ziak ahi atia, zia bep chule hilo kum bang zat ahem ma'ang a school ojapu(teacher) khat a law tawmcha chu thakhat in ahung tam phat chun, a tam dungzui ah sawmakhat piak ding chu ahun thangsia hin kamu, zia hi abul abal i gello ziak ua chutia chu i gel uh hina. Amasapen in Pathian in hinna ei piak bep hilo in, ngaitua ah hetna mangcha ah sum leh pai hawl thei ding ah ei um sak te hi phatak ah i ngaitua leh sawmakhat piak chu piakda na ding lampi umlo hial ahi.

Hinna neilo ah damna kineilo leh hatna mangcha theilo ah sum leh pai hawl thei hilo ahi. Sum leh Pai kihawl theilo ah a kimulo leh sawmakhat kipelo nuam lele piak ding umlo ahi. Ziakachu hinna, damna, tha leh zung, leh lungthim ei petu Pathian kianga kipakthu gen, la sep gualah sawmakhat piak hi thatda lo hial ding ahi.

..Beita

--oOo--

# Thilpiak ah Pathian nasep

Lk. 6:38

-Rev. S.T. Kaia Vaiphei

*Bible Lk. 6: 38. Piata un tichun nanguh le piak in um in lau, a sawt ah sawn chak in, a law ah lawk chak in, a dimlet hial in la angsung ua sun piak in um ding la hiu. Mi la te piaknau ngaima a chun nangmau le te piak ah um ding la hiu.*

**Thumapui:** Khawvel mihing ngaina dan a chun mi zosian piakdaw haksa I sa chiat ua, pedawktu hi sang in dawngtu hi I nuam chiat ui. A diak in Muslim (pangal) ten piakdaw haksa a sa diak ui. Amau thupi khat chu 'pi thokganu, lou sillu' zia chu 'pedawk kin la, la lut zawn' ti ahi. Tawt thu genna a chun, "Pangal ten angka (maths) a hin tinsinba (gawp) leh puriba (gawp sawn) a zil un, khaidokpa (pai) hi a zil puau" a ti sek ui. Ginglotute ngai a chun Pathian ah sawmakhat I piak teu, thawlawm I piakteu, Pathian nasepna leh ama biakna hun tamtak I paiteu hi mingawl gamtatna ahi. Tuhin le Khristian tamtakten lockdown sung ah biakin bawn kikikhawm lo bang ding ah sawmakhat kipe ding hem? Bial upaten bawn hung daw! lo kipe puan a, ti te, Pastor pan bawn ei hung kan kha lo ah sawmakhat kipe puan a, ama nek ding in ka sawmakhat pe puang ka, kochuamten bawn ei hung kantha lo, amau nawptatna ding in ka sawmakhat pe puang ka, ti mi khenkhat a um sek hi. Sawmakhat hi nang a ahi pua, Pathian a ahi. Ama chanvo ahia, a diktak a chun la nei zosia leh la hinna tiang ama a ahia, ama a zosia lak a chun la chan ding leh la mat thei ding in sawm lak ah pakua a hun phal piak la hi zawi. Ziazia-chun, Sawmakhat pelo chu Pathian a guk piak leh gucha ati mai ahi (Mal. 3:8-10). Chuleh Pastorte, semtute leh kochuamte pia I hi puau a, Pathian pia I hi zawu. A mang diklotu chun a ga kiluak in tin, nang in phatak cha la piak ahi chun a le za ah piak thuk ah um mai ding leh Pathian malzawlina dawng mai ding la hi.

## 1. Mihiam hepi ah thilpiak:

Zia thu hi Jesun vantang thilpiak thu leh I mihiam chanpi, hinkhua ah (ethical teaching), insak, inthang, migentheite thil umchan, khawsak chungchang a piak ding dan thu a genna hi-

maleh a thu umdan i genchian jaw tak leh Pathian ah thil piak ah heilut ding ihu.

Thilpiak hi hepina puan-dawna ahi, Jacob chun hepina chu thil hi panglo in a thi ahi a tii. Pathian in ei lungsiat ahi ti i hiat-theina chu a chapa Jesu khrista ei piak leh a malsawmna chuam chuam damtheina, sil leh chen, nek leh chak, sum leh pai, in leh lo, ei piakte jiak hin Pathian lungsiatna chu i mu thei ui. Ziagualmachun ei un le Pathian i hepiu ahi chun Pathian kiang ah thilpiak, a bik in aman ei phut sawmakhat te a lo theilo in i pe ding uh ahi. Ziagualmachun insak inthang, suapi u leh nau i mihiam chanpite i lungsiatnau chu thilpiak in a kilang ding ahi. Pathian in ei thilpiakna ah tena diktak aman gual in enle mi thil i piaknau ah tena diktak i mat ding uh ahi. Teksiate la thingpi dawn man ding, la dummuam man ding tia somkhat, somni i vak piak ah ei vang buaknau in bawn umjia liantak a nei chun, Pathian vangbuakna chun i hinkhuau ah umjia a nei lian ma ma hi. Up-aten i lawipa paipek ah i siam chu eima paipek ah i kisiam ahi

a tiu ahi. Tulai hin min panna, mawpuakna khat i piak chun jia pat chun ken lawkna bang ka mu thei diam ti a gel sek ui. Ken khua sung, kochuam sung, society, pawlpi a ding in bang ka bawldawk thei diam ti sang in jia chun bang phat chuamna ka mu dawk diam ti ah lawkna hawl tamtakte hinkhua sia in kipakna him him a nei ngai puau. La mu nawp ahi chun la piak daw ding ahi. Kine ne jiang hen la kithadawk keilo leh a kidampi diam? Chuti malak in kithipi ding ahi. Tekhinnan tuipi thi (Dead Sea) i ti khu tuitampi luanglut ah a pawtdaw lo jiak ah a lut taphawt thi jiang ahi. I hinna ding in i luandaw, i piakdaw ngai ahi. I piakdaw tam chan in Pathian in ei le ei pe tam mai ding ahi. Paul in thetawm chun at tawm in tin, thetam chun at tam ding ahi a ti ahi (II Cor.9:6). A pe tam chun a mu tam a, mihing chanpi hepitu chu Pathian in a hepi ahi.

**2. Pathian ah thil piak:** Pathian ah thil piak ti hin, thil tamtak a huam khawm a, jiate chu i hinkhua, i hun, i nei leh lam, i sum leh pai te ama a pat i muu ahia, ama i pethuk kit ding uh ahi. Gingtute

hi bang jïak ah kigenthei ahem? I Pathian uhi a genthei a, bangma ei pe zo pua ahi diam? Pathian chaga, genthei khat to la ho khak ahi diam? Thil zosia siamtu neitu, khawvel hausakna zosia neitu i ti sek ngal a, a leh bangtia nang leh kei kijawng ma ma jïang ahi diam? A zïak chu i nasep in a zil-lo bak a, ama a lungawilo jïak in bang gual in hapan le hin le lampi chuam dai in ei heimang piak sek a, vangsiatnan ei tunkhum a, khawsa ul va hial ah gimtak ah i septe chu thildang dai in ei hei daw piak sek a, a gimthawn i hi sek tau ahi. Jeun a gam leh a felna hawl masau in tichun zia thil zosia chu piak belap hin lau, atia, ama hi a masa zaw i kawilo jïak in a dawidan i hawlo jïak in a lungawi pua sek ah ahi. Lalpan Khawpi a ven lo chun a vengtu chu a hak thawn mai ahi. Bang jïak ahem Haggai chun la lampi teu sut ngun un ei ti ahi. “La hun la khawm ua, ka la mut mang a, la neu a la va diak puau a, la sil ua, la lum diak puau a, dangka law chun dip vang ah thun ding bep in ti ahi. Pathian a lungawi lo jïak in gamsung in khawkhal

te, kumthu te, tun sak in van daic-himte ei hentan piak ta ahi. Bang jïak ahem? Unaute haw i lampi-teu sut thak tiam hitiu, Pathian in ei phut sawmakhat ama chanvote i gukpiak sek uh ahi. Thildang in Pathian fia ding patep ding phal i hi puau a, sawmakhat in vang ama ngei in ei patep him tiam un, tin ei malsawm ding in a kitiam a, tichun i hausak nawp chun i pemai ding ahi. A zïakchu aman “sana hi kei a ahin, dangka hi le kei a ahi”(Hag.2:8) ati ahi. Psalm 24:1 chun “lei lung leh a sung ah um zosia hi Lalpa a ahi” a ti ahi. Unaute haw, Paul chun, “Thilpiak chu hawl ka hi puan, nangmau ah ga hung pung ding, malsawmna la dawn ding uh chu hawl ka hi jawi” a ti.

### **3. Pathian ei piak leh Eima piak**

**tekakna:** David chun, “ka chung ah a thilbawl phat zosia jïak ahin Lalpa kiang ah bang ahem ka piak thuk ding? Hukdamna no chu lang ka tin, Lalpa min chawisang ing ka” a ti ahi. Chro.29:14 I et chun David in Pathian kiang ah a thilpiak ding in Pathian kiang apat a dawn tho ma tilo chu piak ding khat le a he pua, “Lal-

pa ken nangma piak ding bang-  
 ma ka nei pua, entiam in nangma  
 a ma ma, nang ka hun pekit hi  
 ti in thil piak a lan ahi. Pathian  
 kiang ah vui thei ding i hi puau.  
 Pathian in la sep gual tuk ah a  
 hun piaklona, a hun malsawmlona  
 a um em kikhual tia, Pathian hi  
 thilpiak in khumjo ding i hi puau,  
 aman ei piak tawh eiman i piak  
 i te lai in bangtik lai in le ama  
 ei piak a tamjaw jing jiang a, la  
 phuak tu chun thilpiak in Pathian  
 chu khumjo/ lan jo ngai puan la,  
 Pathian in mihing lei a ba ngai  
 puai, malzawl na nak ahi ngal a,  
 a ti ahi. I chan ding ah kilawm  
 dawl ei piaklo khat le a um pua,  
 i phulo in malzawlnan ei vuk a,  
 a chapa ei pia, ei thawksik a thawk  
 bep hilo in leilam malsawm nan  
 ei vuk zui na lai ahi. Unaute haw,  
 a chapa hial bawn hawilo ah i

thasang ua pepa chun thildang  
 josia le a thawn ah ei pe lo ding  
 ahem? Ama Lalpa Jesun le, “Lak  
 sangin piak in lukhawng a nei  
 zawi” ati ahi, Pathian malsawm-  
 na i chan theina ding un ama ei  
 piak te hi ama pethuk kit hi tiu,  
 aman ei phut ahi ngal a. Aman  
 ei piakna ding in pia hi tiu ka ti  
 puai, aman ei pe masa, jia chu  
 kipak thu gennan pethuk kit ding  
 in ei phut ahi. I Pathian uh hi thil-  
 piak pe Pathian ahia, a chapa  
 hial le itlo in ei pia, ama hote chu  
 thilpiak pe hi ding in ei dawi ahi.  
 Peta un tichun piak in um in lau,  
 Lalpan a thu simtute zosia dingin  
 malzawl ta hen.

--o0o--

## PATHIAN SIMMAW TAK AH HOTE THIDAN.

**K**hawvel kisiam til apat ahin, ahun ahun in mi minthang agam agam ate zat chuam chuam ala um sek a, a pil ah minthang, ahah ah minthang, lasa thiam leh melhoi ah minthang ahun dungzui in ala um sek ua, ziate lakah a chun Pathian za tak ah Pathian anga ki ngaitawm mama a um un, khenkhat chu a minthang nau chu kisanpi in Pathian hephalo leh Pathian mamaw ahui lam kihephalo kei in akhawsa'u ahi.....

Tuni hin aminthan nau kisanpi ah Pathian simmaw tak ah ala hote chung a Pathian lungnatna ala tuakte chanchin abanban in ala en suk hitiu:-

**(1) THOMAS ANDREW:** Ama hi mithiam tak leh piltak ala hia, Lawng(ship) lianpi tak siam dingin ahung kisinga 'Design' hung bang chan ahem tak lut in abawl ah, azaw phat in amin dingin 'TITANIC' asak ta ahi. Tichun ana sep chu ahung pan a, hun bangan hem tak lut ah, Lawng a siam chu ahung zota, zia phat a chun a en vangvang ah, a Lawng siam chu thupi leh hawi asa mama ziang a, zia hunlai ah news reporter haw khat chun interview ava bawl ta, Lawng hi chu muan um khawp mai in a maw..!? ti dawtna a siam lai in, tia hin ahun dawnhu ta "Muan um e...Pathian inle suse thei puana" ti'n a dawnhu ta mai ahi. Ahin Pathian a din-

gin thil haksa a umlo ahi.

Zia Lawngpi chu a zindaw masakpen ni 5 sung vel tuipi chung a kitawl lai un, vuk tang a sukha bailam tak mai in zia Lawngpi chu kek in mihing tamtak hinna tawh tuipi nuailam in a mangthai khawlaw'u ahi. Ama thiamna suanga Pathian simmawtu ngeile a thilsiam tawh mualpho tak in athi khawlaw ta ahi.

**(2) MARILYN MONROE:** Ama hi American actress, model leh singer minthang mama khat ala hia. A minthan hunlai hi 1950-1960 lai vel ala hia, zia hun lai vel in ama gual ah Pathian thugen minthang khat "Billy Graham" kiti ala um a, Billy Graham le Marlyn Monroe kiangin ava chia

a, Pathian thu ava holimpi ta himaleh Marilyn Monroe chun “La Pathian chu ka mamaw puai” tin ala dawnhu ta mai ah, zia phat a chun Billy Graham inle lungnu-amlo tak kawm in ahung nusia ta, chanchinpha ava holimpi nung sawtlo(chawlkal khat zaw) vel in, Marilyn Monroe chu athidan hitachian theilo khawp in a thi thu ahung kithang ngal ahi.

**(3) JOHN LENON:** Ama hi 1980 lai vel in la sathiam(singer) minthang tak mai ala hia. Ama hunlai tak vel a khan ama sangathiam zaw um puana, ti thei khawp in a thiam a, ama le kisu-ang khawp mai chu hi ding ahia, Megazine reporter ten interview abawl lai ua chun, tia hin ala gen ahi, “Khristian te hi bei hun ala um ngei in a, ti ka hechian hi” ti’n ala gen a, zia bep chu hilo in, “Lal Jesu chu a hawi in apha’i himaleh ama gingtute hi mimawl chacha leh minuainungte ahia a” tu’n chu “Jesu khrista sangin ka minthang zaw’i” ti’n ala gen ahi. Jesu sanga ka minthang zaw’i titu John Lenon chu zia agen zaw hun sawtlo in kaplup in ala um ngal ahi. A pak hunlai a chawmngai

mai.

**(4) BON SCOTT AC/DC:** Ama hi lasathiam Pop singer minthang mama khat ala hia. A lasakte haw hi, Pathian dodalna leh gensiatna ngawn ala hi. 1979’s lai vel in minthang ala hia. La bang zat hem tak akhum(record) nung in a lasak nunung pen chu “Gawtmun zawtna lampi” ti ahi. A La khumte haw a zaw phat in release ahung bawl ta, a minthang mama na chung in release abawl zaw kum khat zaw 1980’s kum in ala thi ngal mai ahi.

**(5) CHRISTINE HEWITT:** Ama hi Jamaica journalist minthang mama khat ala hi. Ahin ama hin thukhat ala gen chu “Khawvel a lekhabu kizik zosia lak ahin ‘BIBLE’ hi alak taklo pen ahi ti’n ala puang ahi. Zia agenzaw kumkhat nungin, huaise tak in amel le hiatthei lo khawp in kum 2000 khan Car sungin mei in a kanglum ahi.

**(6) CAZUZA:** Ama hi Brazillian mi La phuak thiam leh La sak thiam, Brazilian singer ti a minthang mama khat ala hi. Dumzial(cigarette) chep mikhat ala hia. A dumzial cheplai takin a dumkhu chu van chunglam in avak thad-

awk to vangvanga, “Lalpa Pathian zia kha la changvo ding” ti’n dumzial khu chu a mutto ta mai a, ziazaw hun sawtlo in Cancer natna lau umtak chu a chung ah chu in athi pai ngal ahi.

**(7) TANCREDO NEVES:** Ama hi 1985 a khan Brazil gam in President hi nuam in candidate in ala pang a, tia hin ala gen ahi. “Vote singa(50,000) ka mu leh kai ding ka hin, Pathian inle President ka hi ding ei paitha thei ta puana” ala ti hial ahi. Vote sim zaw ahi in, a ti gual in vote 50,000 chu amu ta ngei a, President chu a kilang kai ta, President taktak ahina dingin kitiamna leh namdetna ding a tun masang nikhat

vat in a damlo phut ta, zia chun President hina la manlo in a thi theng ngal ta ahi.

A dang gen ding tamtak um maleh chan hin gentawp phawat hitiu, I gen tak gual in

**THUKHAKNA:** I Pathian uhi simmaw tak a gensiat leh simmaw tak a bawl ding ahilo dan a chung a i taklat teu apat in zillai la chiat dingin i ki dawisak ahi.

“La Pathian min suan tempawt kin” -Exo.20:7. “I Pathian uhi mi kangtum thei meikuang ahi ngal a”-Heb.12:29.

Simtute zosia Lalpa’n malsawm taken.

-By P.T.Khawm

--o0o--



# THAGAU THIANGTHO THILHITHEINA

## (Nasepte 1:4-5, 8; 2:1-4)

-Rev. N.Dalla Vaiphei

Thagau thiangtho thil hitheina i ti phat tak leh, damlo sukdamna, mithi kai thawna, thilmak ki dang dang bawl theina tite haw hi, hidin ngaidan atam zaw'n inei sek ui. Hile ahi him tho ah, maleh zia gual thilmak bawl theina hi mi zosian achan theilo, piakchuam ah umte bep in anei thei uh ala hi.

Himaleh tuni igen nuam uh thagau thiangtho thilhithei na hi mi zosia'n i neithei uh thilpiak ahi ziakin, kuale Khrista ah hinna nei ta zosia'n anei ngei ngei dinguh thagau apat thil hitheina piak ihinau hi tamlo Bible apat in suikhawm leu hin ti ahi.

A bang hileh kum chengah angaina gual in Pentikos ni i mang tei sek ua, zia hichu Israel te'n chiakan kut apat nikhua simto in ni 50 tinni leh buthak lawpna ahem, thai thillat ahem, tia pentikos kut ti ah ala mat sek uh kha pentikos ni iti mai sek uh ala hi.

Thuthungthak hun ahin Lal Jesu kros ah athina leh thawkit ni apat ah simto in ni 50 tinni leh pentikos ni ti in i mangsek uh ahi. Ziaziak chun pentecost tichu Greek pau ah sawmnga tina mai

ala hi. Pentikos ni khan thagau thiangtho piakin umlo leu hin, pentikos hin umzia neilo ding ahi.

Pentikos chu thagau thi-angtho tawh ki matna nei ahi pua, pentikos ni achun thagau thiangtho piakin i um uh ahi zawi. Nungzui tamlo mi 120 vel cha kha Jerusalem pindan chungnung, Marka nu pindan ati sek nau, ni dangah Jesu leh anungzui te'n vaithum anek sek nau mun akhan ni sawmnga sung ving veng Pa thutiam ngak in a um uh ahi.

Zia ah ngak ti hin mawk um top mai ah ngak hi loin, gunchu takin pauchap khawmna te amang sek ua, Juda Iskariot thasang ding telna te khale aisan in anei uh ahi. Pa thutiam chu ni sawmnga tinni chet achun ahung tung ta ahi. Thagau thi-

angtho hungtun ah mak tak mai ah thil hitheina hung um haw chu chawm kim cha cha'n tam loin, vak thilkhawm tiam hitiu:

**1. Thigua pi hattak gualin:** Zia takah thigua ti kampau tak hi hebrai pau in “ruah” ti ahia, a umzia chu thagau thiango gena ala hi daih ahi.

Thagau thiango chu thigua tawh tekhn in thigua pi hattak gualin a umnau In chu alua dim tai, ti ahi. Thigua iti phat leh mut lingtu ahem, sutawi tu, tawisak tu, chawkhak tu tina hisek ahi.

Thagau thiango chun gingtu nun hi a sutawi sek a, chau ah basam ta mai kha a suhal kit sek. Bawl peilo bawl saktu, puk tanung phawng ding kittu, zawngkhal ta suhal kit tu, zia thagau chu ahi pentikos ni piak ah um tu nichan ah gingtu ei suhat zel sek chu.

Thigua hin thil hawilo a mut thian gualn, gingtu nun ahinle thil diklo Lalpa zakda tampi umsek te hi thagau thiango hui chun a mut thiango sek ahi. Thagau thiango mi'n a nei phat leh ama ah thil thiango, buakkai

haw zosia mut thial in, tawi zo talo te tawi zaw kitna anei sek uh ahi.

Thilpiak kawngah tawi but talo, pauchapna ah tawilok zo talo, Bible simna lam ah tha chau thata, biakin kaina kawng ah ki thada ta, zia zosia apat hatna ei piakit thei chu pentikos ni thagau thiango kha ahi. Nangin zia thagau thiango chu la nei ta em ??.

**2. Mei kuang gualin lei ah a hung um a:** Thagau thiango chu mei kuang gualin lei ah hung um in, ahung ki hawmjak ah achang chiat tau. ati ahi.

Zia takah meikwang (fire) ti leh lei (tongue) ti hi ngaitua kham a ting ahi. Mei hi thil halthian na, kangmang tu genna hisek ahi. Mihing ah thil buak kai umte thagau meikwang in akak thian ngai tina ahi. Bible in “Lei hi vak ngam theilo thina gu ah dim ahi.” a ti ahi. (Jakob 3:8)

Zia lei thina gu ah dim gen ding leh genlo ding thial khenlo, zuau theina ah dim hi thagau thiango mei chun ahalthian phat leh mihing thak, lei thak nei ahung hita, thupha

cha cha genna'n ahung pangta, zuau genna lei kha thutak genna ahung hita, gensiat na lei kha pakchatna lei in ahung ki sang danglam ta ahi. Zia chu ei vei thagau thiango tho thil hitheina mitin in chanthei chuh.!

### **3. Pau dang te'n ahung pau tau:**

Thagau thiango tho thil hitheina lam dang tak mitin chung ah kilang thei kit khat chu, pau dang te'n ahung pau tau a, tihiahi. Zia takah pau dang ti kam pau hi sappau achun "other tongue" ti ahia, a umzia chu a ma pianpi pau hilo midang te pau ahung pau tina lam hi in alang ahi.

Sapte'n vaiphei pau thaw henla, vaiphei te kawlpau in pau henla, china ten milawng pau thaw leu, ti gual deu dan ahi. Zia pentikos ni thagau thiango tho zal ah pau dang dang ahung pau sau sau ziangte, alamdang ma ma ziang nau chu, a ngaitha ten amau pau chiat ah ahiahi ziang uh kha ahi.

Bang pau in pau leu le angai tha te'n amau pau chiat ah ahiahi ziang ukha bang atia zia gual thilmak lamdang kha tung ziang atam ? ti dawtna dawnhu-

na chu Bible thiam te'n "Zia hi babel dawnhuna ahi" ala tiu ahi.

Khawvel pumpi tuisang let ah suk mangthai ahi zo ah, Noah suan ten khawvel vai ahun hawm ua khan, shinar phaizawl in Babel insang ahun sa tamai ua, Pathian hi loin amau haw ki suk minthan gua in van suhial ah insang lemto aguut lai un, Pathian lungthim asuna tau ahi.

Zia chun thu awi lona ziakin Pathian in mihingte pau ki bang takah umte chu a pau uh ahun su danglam ta, pau kihetua thei loin a kawi ta ahi. (Gen.11:1-9) tichun pau ki hiattua thei taklo ziakin na asemkhawm thei ta puau a, Lalpa'n a mau chu lei chung zosian athezak ta, tichun leichung ahin, pau chi sang gup sangsagi val lam hial a umta ahi.

Pau chuam chuam, nam chuam chuam, gam chuam chuam, ki hetua talo haw chu Jerusalem ah pentikos mang ahungkhawm zosia chungah chun Pathian ma ma khan pau ki hiat tua kitna din a thagau thiango tho hun sungtha in, a hun gawm khawm kitta ahi. Halleluiah !

Zia thagau thiango tho thil

hitheina zal ah gawp khawm ah um gingu zosia hi pau ki banglo lem lum leu hin le Khrista thisan achun munkhat in ei gawm khawm ah, ki hiat tuana gil tak thagau thiango zal in i nei thei tau ahi. Zia chu ahi la phuak tu'n "Aw nam zosia leh chitin pau tin in, vanlal naubang ah kana Kalvary ah adang diak pua ei." ala ti vung vung mai khah!

A pau leh ham va ki bat sau sau kitna lam hi loin, Khrista Jesu zal ah thagau thiango pawlna in gamla pi umte kha munkhat in ei gawm khawm a, babel hun ah thezak ah umte kha, pumkhat in ei siam kit ta ahi. Zia thagau thiango thil hitheina chu mitin chung ah piakin a um a, kuale anuam tapo in zia thil hitheina mak chu ahang thei uh ahi. Tichun thagau thiango thil hitheina zal achun pau dangah thu kigen chule ei ma nu pau gualin, ki hiat tua theina khat a um ta ahi.

Thagau thiango thil hitheina mak dang kit chu a hung ki hawmzak ah tihhi ahi kit hi. Ki hawm zak tichu ki kaisawn, kilasawn, kipiasawn tina ahi. Thagau

i chan uhi ei ma angung bep ah kawlden mai hi loin, midangte kai sawn ahem, piaksawn zel ahem ahi ding ahi.

Natna ki kaisawn thei gualin, thagau thiango i chan uhi mi dangte kaisawn ah, a mau chungah le thagau thil hitheina kilang to zel ding hi Pathian thil tup ahi. Pentikos ni thagau thiango nungzuite chung tungkha a ban ban ah ki kaisawn in, sawlchak Peter chun thu ahung gen leh mipi sangthum lam chungah chun thagau thiango chu achu ta, nasatak in a ki kaisawn sawn tau uh ahi.

Zia chu ei vei thagau thiango thil hitheina gingu zosian achan uh, midang chungah piaksawn to zel theina thuguk lamdang tak mai chuh!

**4. A lungthim uh sut gualin ana :** Pentikos ni akhan, Sawlchak Peter in hangsan tak mai ah thu ahun gen lai achun thagau thiango thil hitheina'n mipi te lungchang achun na a hun sem ta, a gitlo nateu hung kihiat in a lungthim uh sut gualin na ahun satu ahi.(Nas.2:37)

Gitlona hile maw, thagau

thiangtho in ei hiat saklo leh, mi hiam in eima pilna hiatdaw ziangthei hi ngailo ahi. Thagau thiango thil hithei na chun agitlona teu a muchet sak phat in na asa ma ma tau a, “Suapite haw bangti di kahi tau em,”? tiin ahung kiko dawk tau ahi khah!

Mi thagau thiango thil hithei na'n ahun sukkhak phat leh, a um hiat hiat thei ta pua, gitlona lau umdan ahun muchian a, lauthawng in bang ti ding ka hi tam,? tiin a dinmun lau um dan ahung ki muchian a, hukdamna lampi ahun hawl tun tun sek uh ahi.

Thagau thiango thil hithei na chu gitlo ei ki hiatchian sak a, gitlo lau umdan ei muchian sak bawk ah, gitlo na pat tat dawna kichian tak ei mu sak sek ahi. Sual simna ei neisak a, Jesu chu hukdampa ahi zia ei kawkmua ahi.

**5. Thagau thiango thil hitheina ngak zaw ngai ahi:** Ngak ti hih, mihiam hinkhua ah thil haksia i sak ma ma teu lakah khat hi ngei ina. Ngak peilo ziak ah thil phadinglei asia tampi mu ding bible hunlai leh tulai ziang ale a um

zing ahi.

Abraham te nupa'n in Pathian thutiam ngak zo loin, amau lem ti na'n asuaknu tawh cha ala nei ua, sukdam thei taklo ding insung buaina a tun khawlaw ta ahi. Leng Saul inle thiampu Samuel ngak zo loin, ama bawlo hial ding maicham thil-lat ala bawl ziang leh, Pathian lungthim asuna ta, aleng hina apat paithak in a um khawlaw hial ahi khah,!

Ngak zawna hi malzawl na bul ala hisek him ahia, Pathian chu vaima talua ngailo, vaigei ngai lo, ahun cha thil bawl sek ahi. “Vaigei dingah aki lat chun ngak ham ham in, hung tho tho ding ahin, hung vaigei puan a,” Lalpa Pathian in ati ahi. (Hab.2:3)

Nungzui mi tamlo chate khan le indan chungnung akhan Pa hun tiam kha angak ham ham ua, tichun thagau thiango piak ah um kha achang uh ahi. Mihing kinaw na leh ngakla ziak ah thil ala bawl pai pai hin lawsap na zawk ei la tun khasek ahi.

Thagau thiango nasep na tung nailo ah eima lem tina ah ala ki mawk chawphul mai chun

ga pha ahing dawk ngailo ahi. Numei nau suak hun nailo pi ah ala mawk suaksak gaw le hin zia gual chu hi ding ahi.

Pathian kiangah pauchap chap mai law tinglo gualah kimgai lahi mai thei, maleh ngak ham ham in, nang dingah phazaw Lalpa'n he talua ahi. Lazar damlo lai ah kona nasatak mai kha Lal Jesu'n ngaisaklo hileh ki lawm hialin, athizo than ah nili a um nungin ava chia bep ah, mihing ngai ah vaigei talua ta, ui hial manta himaleh, ahun cha vatung ala hizaw ahi.

A damlo sudam thei tu bepah a ngai uh Lal Jesu kha mithi kaitho thei tu ,thawkitna leh hinna ahi zia tamtak in ataksan khawlaw uh ahi. Zia hin ngak zawna hi malzawlna nasa zawsem muna ahi dan ei hiatsak ahi.

**6. Thagau thiangtho hi gingtute thuam tu ahi di ahi :** Thuam iti phat leh ki van ahem, ki zem ahem tina gual ahi. Laphuak tu chun “ Aw ei thuam in Immanuel, la thagau in ei hung thuam in, zia khawvel gitlo kulpi hih nanga din do zing ingka,” ala ti ahi.

Tulai gingtu tam tak hi

thagau ah thuam na ngai pawimaw lo hileh ki lawm in, kithuam na thil dang dang ngai sang zaw atam tau ahi. Thiamna pilna ah kithuam, nei leh lam ah kithuam, degree sang tak tak ah kithuam, u leh nau hau ah kithuam, tite leh experience hau ahem, senior hina ahem ah kithuam atam tau ahi.

La siamtu khat kit chun, “ Malai sawlchak te la thuam gual khan, la thagau in ei thuam inla, ginna'n la mel hawi ei musak in, lim in lamin chawihawi ingka,” ala ti vung vung mai ahi. Zia hin ei mu sak chu, thagau thiangtho hi kithuam na ah mat ahilo chun bang pen bawl di hileu hinle, law tinna um ngai him himlo di ahi zia ei hiatsak ahi ai chuh!

David naupang cha ahilai ah khan ama zawdi gual hilo philistine milian Goliath kha do din akisa ta, Saul in ama galthuam ah azuk thuam ahi leh, David chu ahithei him him pua, saul galthuam zosia chu apaitha vek ah, Pathian thagau thil hitheina ah kithuam in a kuan ta, a pum a chang ah thik galthuam ah kithuam Goliath chu David chun vai suangse mai khan a do ah atthat

tamai ahi.

Gingtu Pathian chate hatna thuguk chu khawvel lam ah muthei thilhaw hi ahi ngai pua, khawvel in a mu phaklo, thagau thiangtho thil hithei na ah kithuam na hi ala hisek ahi. “ Thagum hat-

na ziak hilo, thi hitheina ziak le hi diaklo, Ka thagau ziak zawn..” Lalpa’n ati ahi. ( Zek.4:6)

--o0o--

## THE GOOD SHEPHERD HOME

### Prebyterian Women Fellowship(KSP) Project(2011-2020)

**1. “The Good Shepherd Home” hung kipat dan:** Nauchaga chawp ding chungchang hi 15<sup>th</sup> January 2010 PWF(KSP) 42<sup>nd</sup> Session & 2<sup>nd</sup> Biennial conference, Leilon Presbyterian Church ah genkhawm pat ahi. Nu leh pa neilo te etkawl na ding a hung ki din na ziak pen tak ahi leh KSP Kochuam sungah a hun lo tak ah nu leh pa khen khat ten a cha teu siam piting man lo ah a hung thi san teu mu in nute lungthim a sukha ma ma sek a, enkawl tu ding mumal umta lo nutsia ah um naupangte haw malam khankhua ding gel khawk na nute lungthim

in a hung dim let tak ziak in zia nasep na chu lunggel in a hung nei pan tau hi. Zia na kipat na ding a chun in tin ah nupi pawl ten veilam ham anchang koi ah thasin leh office lam ah piak lut ding ti lem sak ahi dungzui in veilam ham chu lak khawm pat in ahung um ta’n; Zia sum leh pai te chu mang chan nu leh pa neilo te etkawl na ding chu din pat ahi tai. Chun, 11<sup>th</sup> October 2014 ni hin standing committee in a min ding gen khawm in kilunggual tak in “The Good Shepherd Home” ti min sak ahung hita ahi.

**2. In sak pat dan:** Dt. 24<sup>th</sup> No-

vember, 2010 ni'n PWF(KSP) committee member te leh Khuga Sadar Presbytery puitu te kithu-gualna/lemsakna dungzui in nu leh pa neilo te etkawl na ding in chu K.Salem(KSP mission Field) mun a sak dinga lem sak ahung hi. PWF(KSP) puitu, ob , project board member, kochuam tin le mimal tin ten in Pan nasa tak ah lak zaw nung in Dt. 4<sup>th</sup> April 2011 ni'n Upa Thiankhomang in estimate bawl in pauchapna tawh foundation chu pat ahi tai. Dt. 21<sup>st</sup> October 2011 ni'n Upa Khaineilal Moderator(KSP) in su-ang phuam na nei in Pathian ma-pui na zal "The Good Shepherd Home" in ding chu zaw thian in aum ta ahi. Chun, 27<sup>th</sup> October 2011 ni'n Rev. Marta Rodriguez PWF(USA) in hawn na a nei hi.

### 3. Tup leh Ngîm:

i) Naupang enkawltu ding neilo, kuama lungsiatna chang zo lo leh dawt leh dai a um lo te'n amau in gual ah / nu leh pa angung a um gual ah ngaisakna leh khawtuana a chan theina ding uh leh khawsung/ vengsung ah khandan dik ah ahung khanto thei na ding uh.

ii) Nisin a mamaw thil teu zosia a thei chan ah suk buting piak ding, thiamna/lekha zilna lam ah lawting thei na ding ua tawsawt/ ziltil ding leh a tup leh a ngîm teu a lawting thei na ding ua nisin khawsak dan ua pat panlak pi ding hi ahi.

iii) Nauchaga te hin nu leh pa nei lo ahi na dawl un amau ahin lunggil tak ah ki ngaisiatna ahilo leh Pathian lungsiatna dawng lo ah ki ngaithei na hi amau ahin thil um thei ahi zia in a thagau lam hinkhuau hukdaaw thei na ding ah hukdamna chanchinpha hil ah ziltil hi tup leh ngîm thupi pen ahi.

iv) Atawpna'n, mani keng ah adin chiat thei na dingua ziltil leh kaihuai.

### 4. Sum muna tang pi(Income):

PWF(KSP) in "The Good Shepherd Home" a ding ah sum nâk nei sun ahi leh thasin ah unit tin ah nu ten veilam ham anchang office ah ki submit khawm te hi ahi.

### 5. Tu leh tu hin home ah naupang pagiat (8), warden leh helper te a um ui zia te chu:-

- Naupangte: 1) Mr. Genneipau.  
2) Ms. Jennifer.  
3) Mr. Genlianlal.



- 4) Ms. Kimminhoi.
- 5) Mr. Robinson.
- 6) Mr. Lianminthang.
- 7) Mr. Thanggoulal.
- 8) Mr. Somlalmuon.

Warden: Ms. Kimjoy.

Helper: Mrs. Kimlalhiang.

Simtute'n ministry taksa leh thagau ah malam a sawn zel thei na dingin pauchapna'n delzui chiat hitiu.

*-Miss Tinglemthiam,*

Coordinator PWF (KSP)

--o0o--

## LOCK-DOWN LEH QUARANTINE

~Pro Pastor Pauneithang.

### Thupatna

Khawvel a Covid-19 ziak a, Lock-Down leh Quarantine toh khosa zing in I um uh ahi. Zia Covid-19 hin khawvel pumpi a zen suak jiang tileh hin le, I gen khial lou ding ahi. Ei India gam a le 25<sup>th</sup> March 2020, Wednesday ni apat khan gamvaihawm tuten, Lock-Down a hung koi pan tau ahi. Ei Churachandpur leh Manipur state in le, I phatna dinga ahileh ti in, thunung takin vaihawmte thupukna (order) chu akizui zing ahi.

Covid-19 hi China gam Wuhan a pat hung kipan ahi atiu. A hung kipat sak tu hi, Pathian thu lama vak et in, pathum in I sui nuam uh ahi. Pakhatna, Mihing apat hung kipan, mihingte khutsuak ahi. Panina, Setan apat hung kipan ahi. Setan in mihingte mangcha, a thiltup sukpiting na dinga mat a guat ahi. Mihing apat hin, Setan apat hileh le,

Pathian in a phal louleh hitheilou ahi, ziakachun Pathian in a phal ziak a um ahi. A Pathumna, Pathian a pat ahi, Pathian in mihingte sualna a sangtak ziaka, a lunghei na ding ua a umsak le hithei ahi. Aloh, Pathian in mihing te kian-ga gennop leh hetsak nop a nei le hithei ahi. A sunga I etkhawm ding uh ahileh, Lock-Down leh Quarantine a thumal Bible a ki-

ziak lou maleh, Thuthung lui leh thuthung thak a Lock-Down leh Quarantine Pathian mite mimal hin, insung leh mipi'n banggual in a tuak uh em? Bang gual a thagau lama a lawk piu em? ti te. Nang leh kei inle, I tuak zinglai Lock-Down leh Quarantine sunga bang gual a thagau lama I lok pi thei diam ti chu, I tup pen leh doipen ahi ti hezingin enkhawm hitiu.

### **I. Lock-Down leh Quarantine**

**i. Lock-Down bang ahi em?** Lock-Down hi gam vaihawmte'n emergency thil a, mimal leh mipi, pawtsuk-pawtdawk loudinga thusua a bawl, insung ,vengsung leh gamsung apat le hithei ahi.

Chuleh, Lock-Down hiti hin le het-thei ahi, Jail a umte, Jail sunga hun bang chan ahem khat pawt lumlet theilou a, a bit zawk diak na ding ua, vengtup a um, le hithei ahi.

**ii. Quarantine bang ahi em?** Lock-Down leh Quarantine hi vak genkhawm theina kong le a um a. Ahin, akibat louna chu, Quarantine hi strict zodiak, munchuam bik taka koi a um, natna hii, kikai sawn theilou na dinga, ti ahi.

**iii. Self-Quarantine bang ahi em?** Self-Quarantine ahileh chu, mi-dang toh kisukhalou dinga, hung bangchan ahem, ni bangjat ahem (kal ni leh kal thum le hithei ahi), natna kikai sawn tua louding dawina ziaka. Inn a room khat a le hithei, Inkuan te toh le kitimat/ kisukha lou a um ti ahi.

**II. Covid-19 ziaka Lock-Down, Quarantine leh Self-Quarantine te I tuak nau apat hin, Bible a Pathian mite'n ziagual tobang thil atuak teu genkhawm ding ihu ahi. Eu buai pi hi Corona virus (Covid-19) ahia; Pathian mite'n bible a atuak teu hi, tu ale thagau lam hinkhua I tuak zing uh ahi. A ban ban in en hitiu:**

**i. Noah te Inkuan in Lock-Down leh Quarantine ni 150 sung tuak.**

*"...Noah leh a long sung ah umte bep chu dam in a um tau hi. Leichung pumpi chu ni 150 sung tui in a chupmang suak tai." (Genesis 7:23,24)*

Noah te Inkuan in Lock-Down a tuak uh hi, Pathianin khawvel a mite sualna ziak a gawtna, tuisang a letsak ahi. Zia hi Pathian in a tunsak Lock-

Down leh Quarantine ahi. Noah te inkuan in Pathian thu a zawp ziak ua, Pathian lungnatna virus leng lak apat damna a chang uh ahi. Chuleh, Noah te Inkuan in long sunga ni 150 sung um maleu, Pathian toh a kipawl zing thei uh ahi. Nang leh kei inle, Lock-Down ziaka kikhom theilou a um hi, kilepna suanlama mang theilo ding ihi. A hun leh a mun in zillou ziak a kikhopna um theilou maleh, Noah te inkuan gual a Pathian toh kipawl zing a um thei ihi.

**ii. Lengnu Esther leh Judate'n, Persia gama Ni thum sung Lock-Down a mang uh ahi.**

*"Chia inla, Susa khua Juda mi zosia kokhawm inla, kei a dingin anngawlin pauchap un, sun thum leh zan thum sung chu bangma ne lo leh dawn lo in um chiat un. Nanghaw'n la bawl gual un kei leh ka nasem nungakte hinle bawl ing kau..."* Esther 4:16,17.

Lengnu Esther in nithum sung Mordecai leh Judate'n Lock-Down a mat ding uh a puang a, zia nithum leh zan thum a chu khoima pawtdok lou a, anngawl a pauchapna a nei ding

uh ahi. Ziagual ma chun Esther leh a nasemte'n le a bawl uh ahi. Tichun, Lock-Down chu loting takin a mang uh ahi. A pauchap nau chu Pathian in a sanga, Judate mangthaina ding chu, hukdamna leh malsawmna a chang ta ahi.

Suapite, Lock-Down zia chan hi l mang tau a, anngawl pauchapna in hun la mang kha ta em? Esther te gual a hin, Lock-Down mang pha chuam dingin, ni khat ahiloleh zingkal khat mai cha hilehle, Pauchapna mang dingin pan lai tiu. Taksa leh thagau lama le damthei tak le hisel taka um ding in.

**iii. Job in Lock-Down leh Quarantine tha (month) bangjat ahem Setan soisakna a tuak ahi.**

*"tha tamtak a thawn in ka la mang ta'n, jankhua ah gimthoknate kei a ding ah guat in a umtai."* Job 7:3

Malai a phak chu kho-pam lama munchuam in a umsek ahi. Ziagual ma chun, Job hile phak ahi ziak in, Quarantine a um hiding ahi. Pathian kiang apat phalna la in, Setan in Job hi a soisak ahi. Mi khenkhat in Job

thokgim sung hi ni 360(11 month val) ahi atiu. Kumkhat ting tav-ang ahi. I bible a chun, tha tam-tak akiti ahi. Pathian mite'n haksatna a tuak phat ua leh; Pathian apat hin, Setan apat hin aloleh mihing apat hi jiang lehle, Pathian in thagau lama Piting taka a siam nuam ziak, ala hizaw sek ahi. Taksa lama le, Pathian in lem ati chun malsawmna ahisek ahi. Job in haksatna, natna gimtaka a thok mualsua ziaka Pathain in zawna a chang ahi. Job thok mualsua ziak a Pathain anga setan thipbekin aum ta ahi. Nang leh kei in le, I hinkhua a Pathian zawna pethei dingin pan la dingin iki chial ahi. Job in Quarantine a tuak hi Setan tunsak himaleh, thunung tak leh loting takin a thuak mualsua ahi. Tichun, Pathian lopina a chang ahi a tawp a. Chuleh, thagau lam leh taksa lamin le, Job in malsawmna a leni (double portion) in a chang ahi. A hinkhua le lungtung takin, a tu sawn tiang mu in, a mang chai ahi.

***iv. Mosi'n ama utna ngei in ni sawmli leh zan sawmli, Self-Quarantine Sinai tang in a nei ahi.***

*"Ziaphatchun, tu ma ka bawl gual in LALPA ma-ang in, ni sawmli leh zan sawmli zet ka bokkhup ta'n, LALPA mit mu ah thial sual huaisia tak bawl ah, a lung la hi'nat tak ziak un, bangma ne lo leh dawn lo in kala um ta ahi."* Deuteronomy 9:18.

Covid-19 lau ziaikin, I gam ua Lock-Down tha thum lam I tung tou tau ahi. Bongnou lim biak ziaka, Pathian lungnatna virus huaisia tak, a mi Israelte chungu tung ding chu, a lau um na ding e. Mipi te'n helou maleu, Mosi'n thagau mit in a mu'n, a hechian ma ma ahi. Quarantine a ni sawmni le giat um te'n, a haksat dan hechian diak hitiu in, lock-down mai hileh khop a um tak maizen hitoh. Mosi'n a mi Israelte, Pathian lungnatna Virus huaisia taka pat hukdaw na dingin, ni sawmli leh zan sawmli, an leh tui ngawlin, Pathian kiangin ngaidam a va dawtna ziaikin Israelte chu a thigam lou uh ahi. I gam sung leh kochuam sunga hin, Pathian ang a anngawl a pauchap ngut ngut mi I pawimaw takzet uh ahi.

***v. Elijah ngei le Quarantine ding in,***

***ni sawmli leh zan sawmli lamzawt in, Horeb tang in a va um ahi.***

*“A tho ah, a ne’ a dawn tai; zia a an nek in a hatsakna jal ah chun, ni sawmli leh jan sawmli, Pathian tang Horeb tiang in a chia tai.” (1 Lengte 19:8)*

Zawlnei Elija le Horeb tang lama social distancing neia Self-Quarantine in ava um ahi. Ama hi thiding launa virus zia-ka Horeb tang (Pathian tang le kiti) bel a chia ahi. Pathian nga-ka aum lai in, Pathian in aw-nem hiau (whispering voice) a ahung houpi phatin, thagau lam hat na leh hangsanna a hung nei kit ta ahi. Van apat mei koutha suk a, Baal thiampu te chung a zawn a chang zoupan a, thiding laua a zammang jiang hi lamdang tak ahi. Elijah self-quarantine na apat hin, gingu te thagau lama hat-na thuguk khat chu, munthip a Lal Jesu toh holim a la pauchapna mun kha ahi ti hemil puai tiu.

***vi. Jesu’n ni sawmli leh zan sawmli, ministry a nei patna dingin, thalek gamthip a an le tui ngawl a pauchapna hun, Self-Quarantine ava nei ahi.***

*“Zia zaw chun, Jesu chu diabol*

*thep a um dingin gamthip ah Thagau pui lut in a um ta’n. Ni sawmli leh jan sawmli an ngawl nungin, a gil a hung kial ta’n.” Matthew 4:1,2.*

I Lalpa Jesu’n anngawl a ni sawmli hil hial pauchapna neilou maleh, setan chu a zaw sa ahi. Maleh khawvel mihing zosia etton (best exemplary life) ding ahizak in, thagau pui a um gual in, thumang takin a hung bawl ahi.

Jesu’n self-quarantine a neina ziak pen ahileh, a virus dou chu setan ahi. Setan lalgam a nasem ding ahitak zia-kin, setan toh a kimai tua a, thep in a um a, zawn a chu a chang masa ahi. Jesu’n gingu te anngawl dingin thupiak a nei puai, ahin aman le tigual a anngawl a pauchapna ahung nei ahi chun, pawimaw tak chu hiding ahi. Gingu khenkhat chu Pathianni zingkal sin a te anngawl pauchapna nei bang aum ahi. Nang le kei in le, I zo lou top inle, thakhat (1 month) a zingkal khat ahem bek, eima mimal leh insung a ding bekin, anngawl pauchapna bang nei thei ta le-hin, pha ma ma ding ahi.

**vii. Jesu'n a nungjuite Thagau Thi-  
angtho hung tung masang sia Jeru-  
salem nusia loudingin thupiak anei  
ahi. Zia hi LOCK-DOWN chikhat  
ahi, Jerusalem pawtdaw san loud-  
ing ti hin.**

*"...zia chunglam ah kipat thil-  
hitheina ah thuam ah la um ma-  
sang siau chu, Jerusalem khawpi  
hin um zing un."* Luke 24:49.

I Lalpa Jesu'n a nungjuite Thagau Thiangtho hung tun ma-  
sia Jerusalem pawtdawk louding  
(Lock-Down) a thupiak a bawl  
tawp jiang ahi. A nungjuite te'n le,  
pindan chunglama thumang ta-  
kin, pauchap zing kom in a ngak  
mai uh ahi. Jesu thutiam dungju  
in, a ni sawmnga (Pentecost) ni'n  
Thagau Thiangtho chu a hung tung  
ta ahi. Zia ni apat khan, Thagau  
Thiangtho in nasem zingin, tuni  
tianga Pathian lalgam chu a kek-  
lian zel ahi. Suapite, vak ngaitua  
tiam hitiu, nungjuite te'n Lalpa thu-  
piak kha ala zom lou leu chu. Tuni  
kochuam te'n thagau lama mal-  
sawmna I chan teu hi, Nungjuite  
(sawlhakte) thumatna zia le ahi  
ei vei. Nang le kei in le, Lalpa  
thupiak te, thumang tak leh lun-  
gawi taka zawm zel dingin pan

lai tiu.

### **Thutawpna**

Suapite, I gamsung ua  
Covid-19 zia a Lock-Down leh  
Quarantine I tuak gual un, Bible  
sunga a Pathian mite'n le ala  
tuak uh ahidan muthei leh hetthei  
in aum hi ti, I he tau ahi. Noah  
te Inkuan ahileh, Pathian in Lock-  
Down a bawl khum ahi, khawvel  
mite sual na a sang bek zia kin.  
Esther lekhabu a Lock-Down  
ahileh Lengnu Esther thupiak  
dungjuite a ahia, a virus ahileh  
melma te'n Juda te thachimit  
ding a guang nau apat, Pathian  
hukdamna dinga ahi. Job ahileh  
a damlona phak ahi, setan soi-  
sakna zia a Quarantine a um  
ahi. Setan bawl himaleh Pathian  
in a phal piak ahi. Mosi ahileh  
ama kipiak zawna zia a ahi.  
Israelte milim hoziaka, Pathian  
lungnatna apat suachatna dinga  
ahi. Elijah hinkhua Horeb tang a  
Quarantine zia ahileh, Jezebel  
apat virus a thina dinga thupiak  
zia ahi. I Lalpa Jesu ngei le ni  
sawmli leh zan sawmli, Thagau  
pui a um a thalek a Quarantine  
zia ahileh, a ministry na dinga  
training khat le ahi. Setan lalgam

lakna dinga, setan ava kituak pi le ahi. Chun, Jesu'n a nungjuite Jerusalem nusia loudinga, Lock-Down thupiak a neikhum jiang ahi. Nungjuite thupiak zawpna ziak a chun, Thagau Thiangtho a mite'n a chang uh ahi. Tuni tian-ga Thagau Thiangtho chun a ko-chuam a lamkai zingin, na asem zing ahi.

Suapite, khawvel mun chuam chuam leh I gam ua Covid-19 ziak a, Lock-Down leh Quarantine toh khosa khawm zing pum a I um lai in, Bible hun lai a le Pathian mite'n zia gual chu ala tuak ui. Pathian mi masa te'n, a thil tuak nau a pat thagau lam malsawmna a chan ban ua, lopina Pathian a chang ahi. Eu in le, i thil tuak teu apat thagau lama malsawmna, piting zosem a I khangtou theina ding un mat gua hitiu. Chun, Pathian lopina a chan thei ngei na ding in. Simtute zosia Pathian in malsawm ta hen. Amen.

***Thudawtna or Ngaitua ding te:***

1. Vaihawm tute'n lockdown leh quarantine a bawl uh hi, thunung taka zuizel dingin pha lasa em?
2. Kochuam khenkhat iki khom

thei a, khenkhat khopi sunga umte iki khom thei puai. Vaihawmtute ja na ziak a kikhom lou ihu em? Covid-19 apat kivenna ziak a kikhom lou ihu em?

3. Pawlpi PCI lama te, Manipur Synod lama te, phatakin lockdown gamvaihawm tute bawl a zui zing ua, en le pawlpi te toh kituak a, zui dinga pha lasa em?

4. Covid-19 hi mihing apat ahi em? Setan a pat? Ahiloleh Pathian apat?

5. Covid-19 hi a pun lam a manotou zel ahi ziakin, tunung a Kochuam te'n bang gual a maban sawm ding ihu em?

--o0o--

# BAPTISMA SACRAMENT THU

-Rev. Dr. Hangpi Manlun, E/S. Zou Synod

## 1). Thumapui:

Sacrament ti paukam hi Latin pau ah ‘Sacramentum’ ti apat kilasawn ahi. A umzia chu thil za-um tak hawitak ah phatak ah kimangte genna ahi. Chuleh, baptismal eh Lalpa Zan-an chungchang genna paukam ding in “Sacrament” a la mat ziak uh chu Latin Bible (Vulgate) ah zia paukam hi a la mat ziak uh ahi pen hi. Thil khat umzia thuktak leh giltak neite kigenna ding in zia thumal hi a kimang sek hi. Sepaiten ginumna thutiam (Kasam) a nei uh genna in le a kimang hi.

## 2). Sacrament umzia:

Zia thu hi l hiatchian theina ding un “Westminster Confession” (Presbyterian thugin kingakna in a gente taklang hi tiu. Ziate chu:

2.i). Sacrament thiangthote chu hepina/lungsiatna thuthung etsakna etsakna leh namdetna/teptena ahi. Pathian ngei khutsuak ahia, ziate chun Khrista leh Ama ah thil umte a etsak hi. Ama l ngaisaknau sudettu chun kochuam sung ah mite leh leichung ah midangte kibatlona suklatna le ahi. Pathian thu gual ah Khrista ah Pathian nasem ding ah lunglut tak ah kipiakna le ahi.

2.ii Sacrament in a etsakna leh a thil etsak chu a kizawp ua,

thagau lam thil a hiu. Sacrament phatchuamna chu a a sacrament ah um in a kinga pua, a bawltupa in le a kinga pua, Khrista malzawlina ziak leh ginna ah changtute chung ah thagau in a sep ziak ahi zawi.

2.iii Khrista l Lalpau in sacrament a gente chu chi ni bep ahia, Baptismal eh Lalpa zan-an te hi a hiu. Ziate chu thu ah nasem ding ah diktak ah teldawh ah namdette bep in a bawl thei bep uh ahi.

3). Raman Catholic leh Orthodox kochuamten Sacrament chi sagi (7)- a nei ui: Zaithe chu ahileh:

3.1). Baptisma, 3.2). Lalpa zan-



an 3.3). Gitlo kipuanna 3.4), Kichenna, 3.5). Namdetna, 3.6). Thiampu guatna leh 3.7). Sathau nunate hi ah iu. Chuleh, Salvation Army leh Quaker pawlten Sacrament a nei puau. Protestant kochuam tamzawten Sacrament ni bep I nei un I pawm uh ahi. Ziate chu Baptisma leh Lalpa zan-an te hi a h iu.

Chuleh, tu hin Sacrament ni I nei teu lak ah Baptisma (Sacrament) thu gen ding I h iu.

#### **4). Thuthung lui (Khristiante) um masang ah Baptisma thu:**

Baptisma ti chu Greek pau ah 'Baptizaw' apat kilad-awk ahi. A umzia chu tui ah sil' ahiloleh 'tui chap' leh phum leh dia tite hi a h iu. I Bible uh thuthung lui hi thuthung thak kingakna ahi. A ziak chu I thugin uh leh I sakhua thute hi thuthung lui ah a lim um ding dan a la kigen in thuthung thak in a hung bukim ta ahi. Khristiante um masang a diak in, thuthung lui hun lai in le Baptisma lim leh puam a la kimu ahi. Sawlchak Paul in Israel chate sumpi (Cloud) nuai ah a um uh leh tuipi san a kan thu uh chu Khristiante Baptisma tawh a tekhin a,

Khristiante baptisma lim gual in le a gen hi (I Kor.10:1-2).

Chuleh, Peter in le Nova hunlai ah "tuisang let" lai ah mi giat (Nova te inkuan) hukdam ah umte kha Khristiante Baptisma tawh kibang in a gen hi (I Pet. 3:20). Ni danglai a pat in sakhua ziak ah kisukthianthona chu sakhua tin in a la um hi. Ireland leh Norway gam mun khenkhat a chun nausen a hung pian tak leh nausen tidamna ding a daw i ziak un nausen luchung ah tui a la buak khum ua, tichun a min a phuak ngal sek ui. Zia zaw ah thalup chu tualthana in a ngai uh ahi. Khristian a hung hi nung un le zia gual ah bawl pawl chu a um zing nalai uh ahi. Maleh ziate chu I gen nawp pen uh ahi diak puai.

#### **5). Tu hin a hun dungzui ah Judate lak ah Baptisma chan dan te sui ding I h iu.**

Ziate chu – namdangte Judate phung ah a lutnau Baptismate, Johan Baptisma leh Lalpa Jesun Baptisma a chan thute ahi.

#### **5.i). Namdangte Juda nam ah a lutnau Baptisma thu.**

Zia chu Judate baptisma chan dan ahi. A ziltinlau ah chun

kuale thu tiam ta, (Israel) hi nuam taphawt chun chep a tanua, baptisma a chan zaw tak ua leh kithawina thillat a lat ding uh ti ahi. Chuleh, namdang Juda nam ah kipia nuam a um chun thiampu pathum in dan te a zilti nung ua tui ah (dil/tuiluang ah) a pui ua, tui chu a gawl tiang a tum sak ua, dan thupiak te chu a gen khum ding uh ahi. Zia lo a chun namdang lutna baptisma a channa zia uh chu Mosi dan gual ah a thiantho theina ding uh ahi. Judate tuanthu zik khat in “Baptisma chu namdangten Juda sakhua a pawm ua, a hung lut uh leh Baptisma a chang sek ua, baptisma a chan lo uh leh vang chiakan kut an le a nek thei lo ding uh ahi,” a ti.

**5.ii). Johan Baptisma thu:**

I gensa gual un Khrishtianten baptisma I nei masang un Judaten a la nei tau ahi. Himaleh Baptisma Johan hun ah kipat in Baptisma umzia leh a mat dan I hechian pan uh ahi. Johan in baptisma hi Pathian gam hung tung ding kisaklaw-

kna ding in a mang hi ti I mu ahi. Chuleh, gitlona kisik ah baptisma chang ding in le a gen hi. Maleh Johan baptisma nung a chun Messiah hung ziang pai ding ah ginchakna leh kinepna liantak a um zia in Johan in Judate chu Messiah hung kilak masang ngei ah a gitlonte kisik ah kisuthiang ahi theina ding un baptisma a chansak ahi. Ziakiachun, Johan baptisma chu “khrista baptisma ahiloleh gitlo ngaidamna baptisma kiti ahi.

**5.iii). Jesu'n Baptisma a chan thu:**

Lalpa Jesun le Johan kiang ah baptisma chansak ding ah a dawt chu Johan in mak a sa ma ma hi. Aman khawvel ah a nasep ding te a pat masang in Jordan lui ah Johan kiang in Baptisma a la chang hi (Mat. 3:15). Zia gual dikna dan zaw bukim chu kei a ding in a phai, tin a gen hi. Jesun a gitlonte ngaidamna ding ah baptisma a chan ahi pua, migilote na a sep piak theina ding in a dinmun uh leh a hinau diktak a hiatpiak theina ding in baptisma chang ahi zawi.

Chuleh, Lalpa Jesun, baptisma a chan lai in thil lamdang tak pathum a hung kilang hi. ziate chu: “van a hung kihawng ah, - a chung ah thagau thiango vakhu gual in a hung chu, - van ah kipat aw hung ging in, “Zia hi ka chapa dawi tak ahi, ti a hun puang hi. I gensa gual un, Baptisma hi Lalpa Jesu ngei in a la phu leh a la sukdet ahi ti le hing le kigen khial lo ding ahi.

Ziaziakchun, gingtuten baptisma a chan tak ua leh zia gual ma chun thagau malzawlina chang ding a hui. Chun Jesu van ah a kalto ding kuan in a nungzuite kiang ah “Pa, Chapa leh Thagau thiango min ah baptisma a la bawl sek dig un thu a pia ahi (Mat. 28:19). Zia thupiak chu zui in kochuam masate leh tuni tiang ah gingtuten I bawl to pek uh ahi. Chun, baptisma channa hi Jesu thupiak ahi I ti zing lai un Lalpa Jesun kuama baptisma a chansak vang I he puau. Maleh a nungzuite kiang ah ama ging zosia chu baptisma chansak ding in thu a pia ahi

(Mat. 28:19-20).

### **6.). *Khristiante Baptisma thu:***

Baptisma ti chu sacrament khat ahia, Greek pau ah “Baptizaw” ti a pat lakdaw ahi. A umzia chu ‘Tui ah sil’ ahiloleh ‘tui the’ leh phum / dia ti te a hui. Chuleh, thuthung thak ah baptisma kingakna Bible chang te chu “Khawvel zosian chia un la, namfin ah minungzui in siam un la, Pa, chapa leh Thagau thiango min in baptisma bawl un” (Mat. 28:19). “A ging ah baptisma chang zosia hukdam hi ding a hui,” (Mk. 16:6) ti te hi ahi. Chuleh a chung ah I gensa gual un thuthung lui ah baptism ate chu a lim gual ahia, Lalpa Jesu hun a pat in a tak leh a bukim chu a hung kilag ta ahi. Ziaziakchun, thuthung thak leh Khristiante baptisma chu Lalpa Jesu siam leh phudet a hui a, ziate chu sawlchakte leh kochuamten le I zui to pek uh ahi. Chuleh, Pa, Chapa leh Thagau thiango min ah kochuam ah lutna ding ah gingtute laklutna le ahi. Zialochun, sawlchak Paul zilti dan in baptisma pianthakna thutiam gual in le a gen hi. Sunglam ah piangthak tak tak ten

khawvel ah a gitlonateu thisan in gitlona tawh kizawpna a nei ta puau ti etsakna ding in baptisma a chang sek uh ahi , a ti.

Chuleh, Lalpa Jesu nungzui ding ah kipante kochuam thi- amputen baptisma a chan sak ding uh ahi. Khristian ahinau teptena masapen ahi. Gingthak siamdaw leh baptisma chansak chu a kizui a, kochuam napi pen le ahi.

### **7). Kua min ah baptisma chang ding I hiu em?**

I gensa gual un Lalpa Jesun a nungzuite kiang ah “ Pa, Chapa leh Thagau Thiangtho min in baptisma bawl un” (Mat. 28:19) ti in thu a pia ahi. Zia chun , Pathian ah mi pathum (Trinity) a hung kilang hi. A hin Nasepte 8:16, 10:48, 19:5 te ah Jesu min ah Baptisma mi khenkhat in a chang ui ti I mu ahi. Ziaziakchun, zia thu8 chu gen dan chuam chuam a um thei hi. Chun, Nasepte ziktu Dr. Luka’n, “Jesu min in Baptisma a chang ui “ a tia, a hin baptisma a chanlai ua a phui thu sap uh a gen diak puai. A gen nawp pen chu a changten Jesu chu lal leh hukdampa ding in a pawm

tau” ti ahi pen hi. Chun, Peter in zeng a sukdam lai in le “Nazareth Jesu min in a ti ahi. Baptisma thu ahileh, zia gual chun Peter in a bawl puai. Chuleh, zia hun lai chun Jesu chu Pathian ahi dan puanlatna khat ah a ngai ziak uh le ahi thei hi.

Zialochun, “Jesu min” nungzuiten a la matna ziak uh pipen chu Jesu damlai ngei ah a la mat uh ahiziak in Jesun “Trinity” mang ding ah a gen /a hil lai un le Jesu min bep a hung mat to ziang uh hi mai thei ahi. Chun, Trinity min thum lak ah khat bep a mat mai uh chu Trinity a hiat thiam lo ziak uh ahi.

A til a bul ah a thu hiat uh “Jesu Khrista min in” ahiloleh Lalpa Jesu min in” ti le hi mai thei ahi. Trinity min kihiatna chu a nunung zaw le hi mai thei ahi. Chun Mat. 28:19) tilo ngal Trinity kimatna mun dang ah a kimu bek puai. Chuleh Mathai bu hi Jerusalem siat nung ah kizik ahi ziak hin a, ti pawl le a um ui.

Bang chu hileh Jesun baptisma chansak dingte kiang in a thupiak chu Pastorten a zui ua, “Pa, Chapa leh Thagau Thi-

angtho min in ka hun baptis hi” ti hi zaw ahi. Zia umzia chu Jesu  
 in Jesu thupiak a zui mai uh ahi. Khrista ging in, ama angzung ah  
 Peter in Baptisma chang dingte kitulut in a hinna kikawppi ding  
 kiang ah a thu gen chu Bible ah in baptisma chang un atina ahi  
 I mu a, Jesu Khrista min hezing pen mai hi.  
 pum in Baptisma chang un a ti

--o0o--

## Presbytery sung thu chuam chuam

1. School lam: Lockdown ziak in PMS, Tispari school March last week a pat kailo ah um chu June 2020 thabul a pat khan teacherte tawh parent ten kiholim khawmna nei in, a kithupuknau dungzui un tuhin online in class a nei ua, head Mistress C. Remi leh Teacher Nemsonnei ten le a mun in a va um chil tau ahi. Chun Tonglon D’ School thingtang ahi tawh kitawn in corona virus Covid-19 lak ah him dinmun ahiziak in June 2020 a pat in Head master Thianlam leh Teacher kimmunchawi te chu a kai pan kit tau.
2. Mission Field lam: i) PMS. Tispari School extention kibawl chu sak zaw fel ahi ta, a saknan sum cheng 2,98,800/- bep sen ahi. Tuhin khawvel dinmun a hung hawi phat phat leh M & E Committee te malatna hawmna nei ziang ding ah lemsak ahi.
- ii) Sekmai biakin sak chu zaw vang ahi ta, tuhin a floor siam ding a vat a, zaw ahi tak leh Tispari school extention kibawl tawh nikhat ah hawn khawm ding ah thupukna siam ahi.
- iii) Cachar Mission Field hi a mun ah mite dawina gual ah Torbung Govinpur ti hileh ti chungchang ngaitua ahia, standing ah tut ding ah phasak ahi. Cachar Field a hin tui a haksat ziak in guatui daw

- theina ding tuidawn siam in Syntax 500 litres khat chawk ahi.
3. KSP. Munpi: Trustee Committee malakna ah kum April 2019 a pat KSP. munpi ding Torbung Bangla ah Pu. S.K. Haumang gam ₹. 1 Crore fifteen lakhs ah chawk ding ah pan kihung lato chu tuhin a man piak zaw ahi ta, chawkdaw ahi tai. Lalpa lopina chang ta hen.
  4. Missionary/ Evangelist: Leimakhong Mission Veng Presbyterian kochuam ten Missionary/Evangelist khat chawp ding a hung dawtnau chu M & E, Committee in phalpiak ahin, June 2020 a pat in PMS, Tispari ah Head Mistress C. Remi chu a chawp ding ua piak ahi.
  5. Bible Zil: KSP 62<sup>nd</sup> Annual Session phalpiakna dungzui in Rev. D. Robert Thanga, Field Secretary chu M.Th (Social Analysis) Tamilnadu Theological Seminary ah June 15 a pat khan a zil pan ta, maleh lockdown ziak in online in a kipan phawt ua, khawvel dinmun a hung hawi tak leh a mun ngei ah va chia ding ahi tai. A kumkhatna ding admission fees zosia le kipe vek ahi tai. Chun, ama Field Secretary hina chu guanggalna thak um masang ah Rev. S.T.Kaia Vaiphei Executive Secretary in a puak khawm ding ah thupuk ahi.
  6. Sum lam dinmun: Pathian mapuina jal leh kochuam tinte hapan-na jal in hun haksa nuai ah kochuamte biakin kikhawpna tiang le dawi gual ah I nei thei lo lai un le sum dinmun a hawi to zel nalai a, semtute thalaw pe zing thei in, sum matna ding pawimaw khenkhat ah mat thei ding I nei bak un balance le tamlo leh le I nei sek uh ahi. Kum 2020 Church grant district tin ah piakdaw ahi ta, Synod Assessment a kimkhat piak ahi ta, tuhin budget dungzui ah senna ding tamtak um nalai leh le malam dinmun ding bang gual a hung hi diam ti hiat thei ahilo ziak in ngaikham tak ah tawi a ngai ta, ziaziaichun budget a um, sep mualsua lo a um tak in le kihethiam ding in ka hun dawn hi.

--o0o--

## ‘DAMNA AW’ PHUNGVUKTUTE :

### PATRON MEMBERS :

- |                       |                               |
|-----------------------|-------------------------------|
| 1. Pu P. Vaiphei IAS, | Imphal                        |
| 2. Upa Henthianthang, | S.Kotlian                     |
| 3. T.Upa Haulallawm   | S.Kotlian                     |
| 4. Upa Thienkhomang   | S. Kotlian                    |
| 5. Upa Laltinkhup,    | HQ. Church, Tuibuang          |
| 6. Pi Manliankim,     | HQ. Church, Tuibuang          |
| 7. Upa D. Mina,       | Lingsiphai                    |
| 8. T.Upa Ph. Gena,    | Lingsiphai                    |
| 9. Pu. Khamlal        | Saipum                        |
| 10. Pu Khamliankap    | Saipum                        |
| 11. Pu. Tinlunlal     | Saipum                        |
| 12, Pu. S.Kapbawi     | New Delhi                     |
| 13. Upa Genhau        | Central Church, Compound veng |
| 14. Pu. Khailianbawi  | Central Church, Compound veng |
| 15. Pi Kimtawi        | Kohima                        |
| 16. Tv. Daniel        | Tangmual                      |

### MEMORIAL GIFT :

- |                                |  |
|--------------------------------|--|
| 1. Pi Deem Melody,             | <b>Central Church, (Rengkai)</b><br><i>[In loving memory of (L) Upa Lamthianlal]</i> |
| 2. Pi Rebekah                  | <b>Kangvai</b><br><i>[In loving memory of (L) Pastor Khaivung]</i>                   |
| 3. Upa Liansomthang            | <b>Lingsiphai</b><br><i>[In loving memory of (L) Pu. Henzagen]</i>                   |
| 4. Pi. Nem Grace Boisi Capvung | <b>Delhi</b><br><i>[In loving memory of (L) Pi Vanlalchhuangi]</i>                   |

### SUPPORTING MEMBERS :

- |                           |                 |
|---------------------------|-----------------|
| 1. Upa Khomlunlal         | S.Kotlian,      |
| 2. Pu. S.Thangminlian     | Lingsiphai,     |
| 3. Pu Lelboi,             | Lingsiphai      |
| 4. T.Upa Lalneilian       | Central Church, |
| 5. Pu EL Soson            | Central Church  |
| 6. T.Upa Genminthang,     | Central Church, |
| 7. Pi. Kimneihawi         | Saipum          |
| 8. T.Upa J. Mark          | Saipum          |
| 9. Pu Genthiankap,        | Nghathal        |
| 10. Pu Lianzakhup         | Nghathal.       |
| 11. Pu Lemthang           | L. Mission Veng |
| 12. Rev. S.T.Kaia Vaiphei | Nghathal        |
| 13. Nk. Dimkhoniang       | Zikpi Tampak    |

**ENCOURAGING MEMBERS :**

- |                   |                 |
|-------------------|-----------------|
| 1. Pu K. Minlian  | Tangmual,       |
| 2. Upa Ph. Kamlam | L. Champhai,    |
| 3. Upa S.T.Siam,  | L. Mission Veng |
| 4. Pi Chhungi     | Hq. Tuibuang    |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

(i). Patron member- Kum 3 (three) a ding in. ₹. 3,000/-

(ii). Memorial Gift- Kum 2(two) a ding in. ₹. 2,500/-

(iii). Supporting member- Kum2(two) a ding in ₹. 2,000/-

(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBIN0006182.

**HIATSAKNA**

Damna Aw ngainatna ziaka Encouraging Member ah pangtute zosia chung in kipak thu ka hun gen hi. Editorial Board dawidan dungjui in Encouraging Member hina hih kumkhat bep dinga bithiak ahi tak ziakin tuchung Issue ah kipat hin hung kisulang thei talo ahi. Memberte hi-atthiamna le i kidawn ngal ui.

*~Editor.*